

PL

258/

K8

1886

V.3

讀雪山房唐詩卷六

小傳五

目錄一

詩廿八

詩人小傳六

韓愈

字退之南陽人少孤刻苦爲學盡通六經百家貞元八年擢進士第才高又好直言累被黜貶初爲監察御史上疏極論時事貶陽山令元和中再爲博士改比部郎中史館修撰轉考功知制誥進中書舍人又改庶子裴度討淮西請爲行軍司馬以功遷刑部侍郎諫迎佛骨謫刺史潮州移袁州穆宗卽位召拜國子祭酒兵部侍郎使王廷湊歸轉吏部爲時宰所構罷爲兵部侍郎尋復吏部卒贈禮部尙書諡曰文愈自比孟軻闢佛老異端篤舊

卹孤好誘進後學以之成名者甚眾文自魏晉來
拘偶對體日衰至愈一返之古而爲詩豪放不避
麤險格之變亦自愈始焉集四十卷今鈔五古廿
八首七古廿七首五律五首七律五首五排一首
五絕二首七絕十首

柳宗元

字子厚河東人登進士第應舉宏辭授校書郎調
藍田尉貞元十九年爲監察御史裏行王叔文章
執誼用事尤竒待宗元擢尙書禮部員外郎會叔
文敗貶永州司馬宗元少精警絕倫爲文章雄深
雅健踔厲風發爲當時流輩所推仰旣罹竄逐涉
履蠻瘴居間益自刻苦其堙厄感鬱一寓諸文讀

者爲之悲惻元和十年移柳州刺史江嶺間爲進士者走數千里從宗元遊經指授者爲文辭皆有法世號柳柳州元和十四年卒年四十七集四十五卷今鈔五古九首七古四首七律九首五排三首五絕三首七絕六首

劉禹錫

字夢得彭城人貞元九年擢進士第登博學宏詞科從事淮南幕府入爲監察御史王叔文用事引入禁中與之圖議言無不從轉屯田員外郎判度支鹽鐵案叔文敗坐貶連州刺史在道貶朗州司馬落魄不自聊吐詞多諷託幽遠蠻俗好巫嘗依騷人之旨倚其聲作竹枝詞十餘篇武陵谿洞間

悉歌之居十年召還將置之郎署以作元都觀看
花詩涉譏忿執政不悅復出刺播州裴度以母老
爲言改連州徙夔和二州久之徵入爲主客郎中
又以作重游元都觀詩出分司東都度仍薦爲禮
部郎中集賢直學士度罷出刺蘇州徙汝同二州
遷太子賓客分司禹錫素善詩晚節尤精不幸坐
廢偃蹇寡所合乃以文章自適與白居易酬復頗
多居易敘其詩曰彭城劉夢得詩豪者也其鋒森
然少敢當者又言其詩在處應有神物護持其爲
名流推重如此會昌時加檢校禮部尙書卒年七
十二贈戶部尙書詩集十八卷今鈔五古七首七

古十二首五律七首七律廿六首五排二首五絕
十四首七絕卅首

孟郊

字東野湖州武康人少隱嵩山性介少諧合韓愈
一見爲忘形交年五十得進士第調溧陽尉縣有
投金瀨平陵城林薄蒙翳下有積水郊間往坐水
旁裴回賦詩曹務多廢令白府以假尉代之分其
半俸鄭餘慶爲東都畱守署水陸轉運判官餘慶
鎮興元奏爲參謀卒張籍私謚曰貞曜先生郊爲
詩有理致最爲韓愈所稱然思苦奇澀李觀亦論
其詩曰高處在古無上平處下顧二謝云集十卷
今鈔五古十首七古一首五律一首五絕五首

李賀

字長吉系出鄭王後七歲能辭章韓愈皇甫湜始聞未信過其家使賀賦詩援筆輒就自目曰高軒過二人大驚自是有名賀每旦日出騎弱馬從小奚奴背古錦囊遇所得書投囊中及暮歸足成之率爲常以父名晉肅不肯舉進士詩尙奇詭絕去畦徑當時無能效者樂府數十篇雲韶諸工皆合之絃管仕爲協律郎卒年二十七詩四卷今鈔五古三首七古十三首五律三首五絕一首七絕三首

王建

字仲初潁川人大厯十年進士初爲渭南尉厯秘書丞侍御史太和中出爲陝州司馬從軍塞上後

歸咸陽卜居原上建工樂府與張籍齊名宮詞百
首尤傳誦人口詩集十卷今鈔五古三首七古十
五首五律二首七律六首五絕一首七絕六十二
首

皇甫湜

字持正新安人元和中擢進士第爲陸渾尉仕至
工部郎中裴度辟爲判官集三卷今鈔五古一首

張籍

字文昌蘇州吳人或曰和州烏江人貞元十五年
登進士第授太常寺太祝久之遷秘書郎韓愈薦
爲國子博士厯水部員外郎主客郎中當時有名
士皆與遊而愈賢重之籍爲詩長于樂府多警句
仕終國子司業詩集七卷今鈔五古二首七古十

七首五律九首七律十一首五絕三首七絕十五首

賈島

字浪仙范陽人初爲浮屠名無本來東都時洛陽令禁僧午後不得出島爲詩自傷韓愈憐之因教其爲文遂去浮屠舉進士詩思入僻當其苦吟雖逢公卿貴人不之覺也累舉不中第文宗時坐飛謗貶長江主簿會昌初以普州司倉參軍遷司戶未受命卒有長江集十卷小集三卷今鈔五古一首五律八首七律三首五絕四首七絕五首

袁高

字公頤恕己之孫擢進士第建中中拜京畿觀察使坐累貶韶州刺史復拜給事中憲宗時特贈禮

部尙書五古一首

呂溫

字和叔一字化光河中人貞元末擢進士第因善王叔文再遷爲左拾遺以侍御史使吐蕃元和元年乃還柳宗元等皆坐叔文貶溫獨免進戶部員外郎與竇羣羊士諤相昵羣爲御史中丞薦溫知雜事士諤爲御史宰相李吉甫持之不報溫乘間奏吉甫陰事詰辯皆妄貶均州刺史議者不厭再貶道州久之徙衡州卒集十卷今鈔五古一首五律一首七絕二首

讀雪山房唐詩卷六

五古目錄六

韓愈廿八首

柳宗元九首

劉禹錫七首

孟郊十首

李賀三首

王建三首

皇甫湜一首

張籍二首

賈島一首

袁高一首

呂溫一首

卷之四

THE UNIVERSITY OF CHICAGO

讀雪山房唐詩卷六

五古 六

南山詩

韓愈

吾聞京城南茲惟羣山囿東西兩際海巨細難悉究山經及
地志茫昧非受授團辭試提挈挂一念萬漏欲休諒不能粗
敘所經觀嘗昇崇邱望戢戢見相湊晴明出稜角縷脈碎分
繡蒸嵐相瀕胡孔切洞表裏忽通透無風自飄簸融液煦柔茂

橫雲時平凝點點露數岫天空浮修眉濃綠畫新就孤撐有

巉絕海浴褰鵬噉

音畫以上敘南山大槩

春陽潛沮洳濯濯吐深秀巖

巒雖律卒輒弱類含酎

音宙

夏炎百木盛陰鬱增埋覆神靈曰

歔

音枵

歔雲氣爭結構秋霜喜刻轢磔卓立癯瘦參差相疊重

剛耿陵宇宙冬行雖幽墨冰雪工琢鏤新曦照危峨億丈恒

高表明昏無停態頃刻異狀候以上敘四時變態西南雄太白突起

莫問遙藩都配德運分宅占丁戊音茂逍遙越坤位詆訐陷乾

竇空虛寒兢兢風氣較搜漱朱維方燒日陰霰縱騰糅昆明

大池北去覲偶晴晝縣聯窮俯視倒側困清漚微瀾動水面

踴躍躁猱狄驚呼惜破碎仰喜呀不仆以上言南山方隅連亘之所前尋

徑杜墅岔蔽畢原陋崎嶇上軒昂始得觀覽富行行將遂窮

嶺陸煩互走勃然思坼裂擁掩難恕宥巨靈與夸蛾遠賈期

必售還疑造物意固護蓄精祐力雖能排幹雷電怯呵詬攀

緣脫手足蹢躅抵積蟄茫如試矯首塉塞生恟音寇愁音茂威容

喪蕭爽近新迷遠舊拘官計日月欲進不可又因緣窺其湫

南山有凝湛閼陰巽

音嗅或作獸禮運龍以爲巽謂湫中蛟也

魚蝦可俯掇神物

安敢寇林柯有脫葉欲墮鳥驚救

其湫葉落恐污水鳥卽銜去蓋其神物之靈如此

爭銜彎環飛投棄急哺鰕旋歸道回睨達枿壯復奏吁嗟信

奇怪峙質能化質前年遭譴謫探厯得邂逅初從藍田入顧

盼勞頸脰時天晦大雪淚目苦矇瞶

音茂

峻塗拖長冰直上若

懸溜褰衣步推馬顛蹶退且復蒼黃忘遐睎所矚纔左右杉

篁陀蒲蘇杲耀攢介冑專心憶平道脫險逾避臭昨來逢清

霽宿願忻始副崢嶸躋豕頂倏閃雜颺馳前低劃開闊爛漫

堆眾皴

言豁然見前山之低雖有高陵深谷但如皴物微有蹙折之文耳

或連若相從或蹙

若相鬬或妥若弭伏或竦若驚雉或散若瓦解或赴若輻湊

或翩若船游或決若馬驟或背若相惡或向若相佑或亂若

抽筭或噪若注灸或錯若繪畫或繚若篆籀或羅若星離或

翥若雲逗或浮若波濤或碎若鋤耨或如賁育倫賭勝勇前

購先強勢已出後鈍嗔誼音譙音耨不或如帝王尊叢集朝

賤幼雖親不褻狎雖遠不悖謬或如臨食案肴核紛飭餽又

如游九原墳墓包槨柩或纍若盆罌或揭若甌同豆一作或

覆若曝鼈或頽若寢獸或蜿若藏龍或翼若搏驚或齊若友

朋或隨若先後或迸若流落或顧若宿留或戾若仇讐或密

若婚媾或儼若峨冠或翻若舞袖或屹若戰陣或圍若蒐狩

或靡然東注或偃然北首或如火熺焰或若氣饋音餽音溜

也或行而不輟或遺而不收或斜而不倚或弛而不彀或赤

若禿鬻丘閑切或燠若柴標或如龜拆兆或如卦分繇或前橫

若剝或後斷若妬延離又屬夬夬叛還遘喁喁魚闖萍落
落月經宿閭閭樹牆垣嘯嘯駕庫廐參參削劍戟煥煥銜瑩
琇敷敷花披萼闌闌屋摧雷悠悠舒而安兀兀狂以狃超超
出猶奔蠢蠢駭不懋大哉立天地經紀肖營腴厥初孰開張
僂俛誰勸侑創茲樸而巧戮力忍勞疚得非施斧斤無乃假
詛咒鴻荒竟無傳功大莫酬儗嘗聞於祠官芬芳降歆嗅斐
然作歌詩惟用贊報酹

秋懷詩

十一首
之四

牕前兩好樹眾葉光蕤蕤音擬秋風一拂披策策鳴不已微燈
照空牀夜半偏入耳愁憂無端來感歎成坐起天明視顏色
與故不相似羲和驅日月疾急不可恃浮生雖多塗趨死惟

一軌胡爲浪自苦得酒且歡喜

彼時何卒卒我志何曼曼

音萬

犀首空好飲廉頗尙能飯學堂

日無事驅馬適所願茫茫出門路欲去聊自勸歸還閱書史
文字浩千萬陳迹竟誰尋賤嗜非貴獻丈夫意有在女子乃
多怨

秋氣日惻惻秋空日淩淩上無枝上蜩下無盤中蠅豈不感
時節耳目去所憎清曉卷書坐南山見高稜其下澄秋水有
蛟寒可層惜哉不得往豈謂吾無能

離離挂空悲感感抱虛警露泣秋樹高蟲弔寒夜永斂退就
新懦趨營悼前猛歸愚識夷塗汲古得脩綆名浮猶有恥味
薄真自幸庶幾遺悔尤卽此是幽屏

此日足可惜贈張籍

愈時在徐籍往謁之辭去作是詩以送

此日足可惜此酒不足嘗捨酒去相語共分一日光念昔未

知子孟君自南方自矜有所得言子有文章我名屬相府

時在

董晉幕府

欲往不得行思之不可見百端在中腸維時月魄死冬

日朝在房馳驅公事退聞子適及城命車載之至引坐于中

堂開懷聽其說往往副所望孔邱歿已遠仁義路久荒紛紛

百家起詭怪相披猖長老守所聞後生習爲常少知誠難得

純粹古已亡譬彼植園木有根易爲長畱之不遣去館置城

西旁歲時未云幾浩浩觀湖江眾夫指之笑謂我知不明兒

童畏雷電魚鼈驚夜光州家舉進士選試繆所當

汴州舉進士愈爲考

官試反舌無聲詩籍中等

馳辭對我策章句何煒煌相公朝服立工席歌

鹿鳴禮終樂亦闋相拜送於庭之子去須臾赫赫流盛名竊

喜復竊歎諒知有所成人事安可恆奄忽令我傷聞子高第

日正從相公喪

貞元十五年高郢知舉籍登第是歲二月晉卒愈護其喪行

哀情逢吉語

恂悅難爲雙暮宿偃師西徒展轉在牀夜聞汴州亂遶壁行

徬徨我時畱妻子倉卒不及將相見不復期零落甘所丁驕

兒未絕乳念之不能忘忽如在我所耳若聞啼聲中途安得

返一日不可更俄有東來說我家免罹殃乘船下汴水東去

趨彭城從喪朝至洛還走不及停假道經盟津出入行澗岡

日西入軍門羸馬顛且僵主人願少畱延入陳壺觴

時李元爲河陽

節度主人謂元也

卑賤不敢辭忽忽心如狂飲食豈知味絲竹徒轟

轟平明脫身去決若驚鳧翔黃昏次汜水欲過無舟航號呼

久乃至夜濟十里黃中流上灘渾沙水不可詳驚波暗合沓
星宿爭翻芒轅馬蹢躅鳴左右泣僕童甲午憩時門臨泉窺
鬪龍東南出陳許陂澤平茫茫道邊草木花紅紫相低昂百
里不逢人角角雄雉鳴行行二月暮乃及徐南疆下馬步隄
岸上船拜吾兄誰云經艱難百口無天殤僕射南陽公宅我
睢水陽二月愈至徐徐泗濠節度使張建封以愈爲節度推官篋中有餘衣盎中有餘
糧閉門讀書史牕戶忽已涼日念子來游子豈知我情別離
未爲久辛苦多所經對食每不飽共言無倦聽連延三十日
晨坐達五更我友二三子宦遊在西京東野窺禹穴李翱觀
濤江蕭條千萬里會合安可逢淮之水舒舒楚山直叢叢子
又捨我去我懷焉所窮男兒不再壯百歲如風狂高爵尙可

詩集山房見言卷六
三
求無爲守一鄉

醉贈張秘書

人皆勸我酒我若耳不聞今日到君家呼酒持勸君爲此座上客及余各能文君詩多態度藹藹春空雲東野動驚俗天葩吐奇芬張籍學古淡軒鶴避雞羣阿買不識字頗知書八分詩成使之寫亦足張吾軍所以欲得酒爲文俟其醺酒味既冷冽酒氣又氛氲性情漸浩浩諧笑方云云此誠得酒意餘外徒續紛長安眾富兒盤饌羅羶葷不解文字飲惟能醉紅蓆雖得一餉樂有如聚飛蚊今我及數子固無猶與薰險語破鬼膽高詞媿皇墳至寶不雕琢神功謝鋤耔方今向太平元凱承華勛吾徒幸無事庶以窮朝曛

送惠師

惠師浮屠者乃是不羈人十五愛山水超然謝朋親脫冠翦
頭髮飛步遺蹤塵發迹入四明梯空上秋旻遂登天台望眾
壑皆嶙峋夜宿最高頂舉頭看星辰光芒相照燭南北爭羅
陳茲地絕翔走自然嚴且神微風吹木石澎湃聞韶鈞夜半
起下視溟波銜日輪魚龍驚踊躍叫嘯成悲辛怪氣或紫赤
敲磨共輪囷金鷄旣騰翥六合俄清新常聞禹穴奇東去窺
甌閩越俗不好古流傳失其真幽蹤邈難得聖路嗟長堙迴
臨浙江濤屹起高峨岷壯志死不息千年如隔晨是非竟何
有棄去非吾倫淩江詣廬嶽浩蕩極遊巡崔嵬沒雲表陂陀
浸湖淪是時雨初霽懸瀑垂天紳前年往羅浮步戛南海濬

大哉陽德盛榮茂恆畱春鵬騫墮長翮鯨戲側修鱗自來連
州守曾未造城闔日攜青雲客探勝窮崖濱太守邀不去羣
官請徒頻囊無一金貲翻謂富者貧昨日忽不見我今訪其
隣奔波自追及把手問所因顧我卻興歎君寧異于民離合
自古然辭別安足珍吾聞九疑好風志今欲伸斑竹啼舜婦
清湘沈楚臣衡山與洞庭此固道所循尋崧方抵洛厯華遂
之秦浮游靡定處偶往卽通津吾言子當去子道非吾遵江
魚不池活野鳥難籠馴吾非西方教憐子狂且醕吾嫉惰遊
者憐子愚且諳去矣各異趣何爲浪霑巾

送靈師

佛法入中國爾來六百年齊民逃賦役高士著幽禪官吏不

之制紛紛聽其然耕桑日失利朝署時遺賢靈師皇甫姓允
胄本蟬聯少小涉書史早能綴文篇中間不得意失迹成延
遷逸志不拘教軒騰斷牽攀圍碁鬪白黑生死隨機權六博
在一擲梟盧叱迴旋戰詩誰與敵浩汗橫戈鋌飲酒盡百琰
嘲諧思逾鮮有時醉花月高唱清且緜四座咸寂默杳如奏
湘絃尋勝不憚險黔江屢洞沿瞿塘五六月驚電讓歸船怒
水忽中裂千尋墮幽泉環迴勢益急仰見團團天投身豈得
計性命甘徒捐浪沫蹙翻涌漂浮再生全同行二十人魂骨
俱坑填靈師不掛懷冒涉道轉延開忠二州牧詩賦時多傳
失職不把筆珠璣爲君編強畱費日月密密席羅嬋娟昨者至
林邑使君數開筵逐客三四公盈懷贈蘭茝湖游泛潏沅溪

宴駐潺湲別語不許出行裾動遭牽鄰州競招請書札何翩
翩十月下桂嶺乘寒恣窺緣落落王員外爭迎獲其先自從
入賓館占恹久能專吾徒頗攜被接宿窮歡妍聽說兩京事
分明皆眼前縱橫雜謠俗瑱屑咸羅穿材調真可惜朱丹在
磨研方將歛之道且欲冠其顛韶陽李太守高步凌雲煙得
客輒忘食開囊乞繒錢手持南曹敘字重青瑤鐫古氣參豕
繫高標摧太元維舟事干謁披讀頭風痊還如舊相識傾壺
暢幽悃以此復畱滯歸驂幾時鞭

縣齋有懷

陽山縣齋作時貞元二十一年順宗新卽位

少小尙奇偉平生足悲吒猶嫌子夏儒肯學樊遲稼事業窺
臯稷文章蔑曹謝濯纓起江湖綴佩雜蘭麝悠悠指長道去

去策高駕誰爲傾國媒自許連城價初隨計吏貢屢入澤宮
射雖免十上勞何能一戰霸人情忌殊異世路多權詐蹉跎
顏遂低摧折氣愈下治長信非罪侯生或遭罵懷書出皇都
銜淚渡清灞身將老寂寞志欲死閑暇朝食不盈腸冬衣纔
掩骼枯駕切軍書旣頻召戎馬乃連跨大梁從相公彭城赴僕
射弓箭圍狐兔絲竹羅酒餽兩府變荒涼三年就休假求官
去東洛犯雪過西華塵埃紫陌春風雨靈臺夜名聲荷朋友
援引乏姻婭雖陪彤庭臣詎縱青冥靶寒空聳危闕曉色曜
修架捐軀辰在丁鍛翮時方禘投荒誠職分領邑幸寬赦湖
波翻日車嶺石坼天罅毒霧恆熏晝炎風每燒夏雷威固已
加颶勢仍相借風象杳難測聲音吁可怕夷言聽未慣越俗

言雪山房詩卷六
循猶乍指摘兩憎嫌
睚眦互猜訝祇緣恩未報
豈謂生足藉
嗣皇新繼明
率土日流化
惟思滌瑕垢
長去事桑柘
斷嵩開
雲局壓頴抗
風榭禾麥種
滿地黎棗栽
繞舍兒童稍
長成雀
鼠得驅嚇
官租日輸納
村酒時邀迓
閑愛老農愚
歸弄小女
姍如今便可爾
何用畢婚嫁

陪杜侍御遊湘西兩寺獨宿有題一首因獻楊常侍

長沙千里平勝地
猶在險况當江闊處
斗起勢匪漸
深林高玲瓏
青山上琬琰路
窮臺殿闢佛事
煥且儼剖竹走
泉源開廊架崖
厂是時秋之殘
暑氣尙未歛
羣行忘後先
朋息棄拘檢
客堂喜空涼
華榻有清簟
澗蔬煮蒿芹
水果剝菱芡
伊余夙所慕
陪賞亦云忝
幸逢車馬歸
獨宿門不掩
山樓黑無月

漁火燦星點夜風一何喧杉檜屢磨颭猶疑在波濤恍惕夢
成麗靜思屈原沈遠憶賈誼貶椒蘭爭妒忌絳灌共讒諂誰
令悲生腸坐使淚盈臉翻飛乏羽翼指摘困瑕玷珥貂藩維
重政化類分陝禮賢道何優奉己事苦儉大廈棟方隆巨川
楫行剡經營誠少暇遊宴固已歉旅程媿淹留徂歲嗟荏苒
平生每多感柔翰遇頻染展轉嶺猿鳴曙燈青睽睽

岳陽樓別竇司直

庠

洞庭九州間厥大誰與讓南匯羣崖水北注何奔放瀦爲七
百里吞納各殊狀自古澄不清環混無歸向炎風日搜攪幽
怪多冗長去聲軒然大波起宇宙隘而妨音訪巍我拔嵩華騰蹕
較健壯聲音一何宏轟輶音渴車萬兩猶疑帝軒轅張樂就空

曠蛟螭露筍簾縞練吹組帳鬼神非人世節奏頗跌宕陽施
見誇麗陰閉感悽愴朝過宜春口極北缺隄障夜纜巴陵洲
叢芮纔可傍星河盡涵泳俯仰迷下上餘瀾怒不已喧聒鳴
甕盎明登岳陽樓輝煥朝日亮飛廉戢其威清宴息纖纈泓
澄湛凝綠物影巧相況江豚時出戲驚波忽蕩漾時當冬之
孟隙竅縮寒漲前臨指近岸側坐眇難望滌濯神魂醒幽懷
舒以暢主人孩童舊握手乍忻悵憐我竄逐歸相見得無恙
開筵交履舄爛漫倒家釀栢行無畱停高柱送清唱中盤進
橙栗投擲傾脯醬歡窮悲心生婉戀不能忘

音望

念昔始讀書

志欲干霸王屠龍破千金爲藝亦云亢愛才不擇行觸事得
讒謗前年出官由此禍最無妄公卿採虛名擢拜識天仗姦

猜畏彈射斥逐恣欺誑新恩移府庭逼則廁諸將于嗟苦驚
緩但懼失宜當追思南渡時魚腹甘所葬嚴程迫風帆劈箭
入高浪顛沈在須臾忠鯁誰復諒生還真可喜尅已自懲創
庶從今日後粗識得與喪事多改前好趣有獲新尙誓耕十
畝田不取萬乘相細君知蠶織稚子已能餉行當掛其冠生
死君一訪

送文暢師北遊

昔在四門館晨有僧來謁自言本吳人少小學城闕已窮佛
根源粗識事輒輒攣拘屈吾真戒轄思遠發薦紳秉筆徒聲
譽耀前閥從求送行詩屢造忍顛蹶今成十餘卷浩汗羅斧
鉞先生閤窮巷未得窺剗剗又聞識大道何路補剗剗出其

囊中文滿聽實清越謂僧當少安草序頗排訐上論古之初
所以施賞罰下開迷惑胸宰豁劇株櫬僧時不聽瑩若飲水
救渴風塵一出門時日多如髮三年竄荒嶺守縣坐深樾徵
租聚異物詭製怛巾韞幽窮誰共語思想甚含噓昨來得京
官照壁喜見蝎况逢舊親識無不比鷦歷長安多門戶弔慶
少休歇而能勤來過重惠安可揭當今聖政初恩澤實臧狨
胡爲不自暇飄戾逐鷗鷗僕射領北門威德壓胡羯相公鎮
幽都竹帛爛勳伐酒場舞閨姝獵騎圍邊月開張篋中寶自
可得津筏從茲富裘馬寧復茹藜蕨余期報恩後謝病老耕
垡庇身指蓬茅逞志縱獫狁僧還相訪來山藥煮可掘

答張徹

辱贈不知報我歌爾其聆首敘始識面次言後分形道路綿
萬里日月垂十齡浚郊避兵亂睢岸連門停肝膽一古劒波
濤兩浮萍漬墨竄舊史磨丹注前經義苑手秘寶文堂耳驚
霆暄晨躡露舄暑夕眠風櫺結友子讓抗請師我慙丁初味
猶噉蔗遂通斯建瓴搜奇日有富嗜善心無甯石梁平佺佺
沙水光泠泠乘枯摘野豔沈細抽潛腥遊寺去陟巘尋徑返
穿汀緣雲竹竦竦失路麻冥冥滌滌忽翻野平蕪眇開溟防
泄塹夜塞懼衝城晝局及去事戎轡相逢宴軍伶觥秋縱兀
兀獵旦馳駟駟從賦始分手朝京忽同舫急時促暗棹戀月
畱虛亭畢事驅傳馬安居守牕螢梅花灞水別宮燭驪山醒
省選逮投足鄉賓尙摧翎塵袂又一摻泥背還雙熒洛邑得

休告華山窮絕陁倚巖睨海浪引袖拂天星曰駕此迴轄金
神所司刑泉紳拖修白石劍攢高青磴蘚遶拳跼梯飈颭伶
俦悔狂已咋指垂誠仍鐫銘峨豸忝備列伏蒲媿分涇微誠
慕橫草瑣力摧撞廷疊雪走商嶺飛波航洞庭下險疑墮井
守官類拘囹荒餐茹獠蠱幽夢感湘靈刺史肅著蔡吏人沸
蝗螟點綴簿上字趨蹌閣前鈴賴其飽山水得以娛瞻聽紫
榭雕斐壘碧流滴瓏玲映波鋪遠錦插地列長屏愁狄酸骨
死怪花醉魂馨潛苞絳實坼幽乳翠毛零赦行五百里月變
三十莢漸階羣振鷺入學誨螟蛉萃甘謝鳴鹿疊滿慚罄瓶
同同抱瑚璉飛飛聯鵲鵠魚鬢欲脫背虬光先照硯豈獨出
醜類方當動朝廷勤來得晤語勿憚宿寒廳

薦士

薦孟郊于鄭餘慶也

周詩三百篇雅麗理訓誥曾經聖人手議論安敢到五言出
漢時蘇李首更號東都漸瀾漫派別百川導建安能者七卓
犖變風操逶迤抵晉宋氣象日凋耗中間數鮑謝比近最清
奧齊梁及陳隋眾作等蟬噪搜春摘花卉汙襲傷剽盜國朝
盛文章子昂始高蹈勃興得李杜萬類困陵暴後來相繼生
亦各臻闢奧有窮者孟郊受材實雄鷲冥觀洞古今象外逐
幽好橫空盤硬語妥帖力排冑敷柔肆紆餘奮猛卷海潦榮
華肖天秀捷疾逾響報行身踐規矩甘辱恥媚竈孟軻分邪
正眸子看瞭眊杳然粹而清可以鎮浮躁酸寒溧陽尉五十
幾何毫孜孜營甘旨辛苦久所冒俗流知者誰指注競嘲傲

聖皇索遺逸髦士日登造廟堂有賢相愛遇均覆燾況承歸

與張

孟郊爲歸登張建封所知

二公迭嗟悼青冥送吹噓強箭射魯縞胡

爲久無成使以歸期告霜風破佳菊嘉節迫吹帽念將決焉

去感物增戀嫪

盧到切

彼微水中荇尙煩左右芼魯侯國至小

廟鼎猶納郤幸當擇珉玉甯有棄珪瑁悠悠我之思擾擾風
中燾上言愧無路日夜惟心禱鶴翎不天生變化在啄菹通
波非難圖尺地易可漕善善不汲汲後時徒悔懊救死具八
珍不如一簞犒微詩公勿誚愷悌神所勞

送石洪處士赴河陽幕得起字

長把種樹書人云避世士忽騎將軍馬自號報恩子風雲入

壯懷泉石別幽耳鉅鹿師欲老常山險猶恃

時翼鎮王承宗反以兵討之無

功遂赦
承宗

豈惟彼相憂固是吾徒恥去去事方急酒行可以起

送無本師歸范陽

賈島初爲浮屠名無本

無本於爲文身大不及膽吾嘗示之難勇往無不敢蛟龍弄
角牙造次欲手攬眾鬼囚大幽下戲襲元宵天陽熙四海注
視首不領鯨鵬相摩宰兩舉快一噉夫豈能必然固已謝黯
黷狂詞肆滂葩低昂見舒慘姦窮變怪得往往造平淡蜂蟬
碎錦纈綠池披菡萏芝英擢荒榛孤翮起連茭家住幽都遠
未識氣先感來尋吾何能無殊嗜昌歎始見洛陽春桃枝綴
紅糝遂來長安里時卦轉習坎老嬾無關心久不事鉛槧欲
以金帛酬舉室常顧領念當委我去雪霜刻以懜獐飆攬空
衢天地與頓撼勉率吐歌詩慰女別後覽

贈張籍

吾老嗜讀書餘事不掛眼有兒雖甚憐教示不免簡君來好
呼出踉蹌越門限懼其無所知見則先媿赧昨因有緣事上
馬插手版畱君住廳食使立侍盤饊薄暮歸見君迎我笑而
莞指渠相賀言此是萬金產吾愛其風骨粹美無可揀試將
詩義陳如以肉貫弗開祛露毫末自得高蹇嶮我身蹈邱軻
爵位不早綰固宜長有人文章紹編剡感荷君子德悅若乘
朽棧召令吐所記解摘了瑟僂顧視窗壁間親戚競覘音
喜氣排寒冬逼耳鳴睨睨如今更誰恨便可耕灞滻

調張籍

李杜文章在光燄萬丈長不知羣兒愚那用故謗傷蚍蜉撼

大樹可笑不自量伊我生其後舉頸遙相望夜夢多見之晝
思反微茫徒觀斧鑿痕不矚治水航想當施手時巨刃摩天
揚垠崖劃崩豁乾坤擺雷硯惟此兩夫子家居率荒涼帝欲
長吟哦故遣起且僵翦翎送籠中使看百鳥翔平生千萬篇
金甕垂琳琅仙官敕六丁雷電下取將流落人間者太山一
毫芒我願生兩翅捕逐出入荒精誠忽交通百怪入我腸刺
手拔鯨牙舉瓢酌天漿騰身跨汗漫不著織女襄顧語地上
友經營無太忙乞君飛霞佩與我高頡頏

病中贈張十八

中虛得暴下避冷臥北窗不蹋曉鼓朝安眠聽逢逢籍也處
閭里抱能未施邦文章自娛戲金石日擊撞龍文百斛鼎筆

言言山房集卷之二
力可獨扛談舌久不掉非君亮誰雙扶几導之言曲節初撻
撻半塗喜開鑿派別失大江吾欲盈其氣不令見麾幢牛羊
滿田野解旆束空杠傾樽與斟酌四壁堆罍缸元帷隔雪風
照鑪釘明釭夜闌縱捩闔哆口疏眉厖勢侔高陽翁坐約齊
橫降連日挾所有形軀頓降肛將歸乃徐謂子言得毋吮迴
軍與角逐斫樹收窮龐雌聲吐款要酒壺綴羊腔君乃崑崙
渠籍迺嶺頭瀧譬如蟻垤微詎可陵崆峒幸願終賜之斬拔
枿與椿從此識歸處東流水淙淙

瀧吏

南行逾六旬始下昌樂瀧險惡不可狀船石相舂撞往問瀧
頭吏潮州尙幾里行當何時到土風復何似瀧吏垂手笑官

何問之愚譬官居京邑何由知東吳東吳遊宦鄉官知自有
由潮州底處所有罪乃竄流儂幸無負犯何由到而知官今
行自到那遽妄問爲不虞卒見困汗出媿且駭吏曰聊戲官
儂嘗使往罷嶺南大抵同官去道苦遼下此三千里有州始
名潮惡溪瘴毒聚雷電常洶洶鱷魚大於船牙眼怖殺儂州
南數十里有海無天地颶風有時作掀簸真差去聲事聖人於
天下於物無不容比聞此州囚亦有生還儂官無嫌此州固
罪人所徙官當明時來事不待說委官不自謹慎宜卽引分
往胡爲此水邊神色久懔慌音大餅嬰小所任自有宜官
何不自量滿溢以取斯工農雖小人事業各有守不知官在
朝有益國家不得無虱其間不武亦不文仁義飭其躬巧姦

言言山房詩卷六
五
敗羣倫叩頭謝吏言始慚今更羞厯官二十餘國恩竝未酬
凡吏之所訶嗟實頗有之不卽金木誅敢不識恩私潮州雖
云遠雖惡不可過於身實已多敢不持白賀

示兒

始我來京師止攜一束書辛勤三十年以有此屋廬此屋豈
爲華於我自有餘中堂高且新四時登牢蔬前榮饌賓親冠
昏之所於庭內無所有高樹八九株有藤婁絡之春華夏陰
敷東堂坐見山雲風相吹噓松果連南亭外有瓜芋區西偏
屋不多槐榆翳空虛山鳥旦夕鳴有類澗谷居主婦治北堂
膳服適戚疏恩封高平君子孫從朝裾開門問誰來無非卿
大夫不知官高卑玉帶懸金魚問客之所爲我冠講唐虞酒

食罷無爲棊槊以相娛凡此座中人十九持釣樞又問誰與
頻莫與張樊如來過亦無事考評道精麤蹢躅媚學子牆屏
日有徒以能問不能其蔽豈可祛嗟我不修飾事與庸人俱
安能坐如此比肩於朝儒詩以示兒曹其無迷厥初

送諸葛覺往隨州讀書

李繁時爲隨州刺史宰相泌之子也

鄴侯家多書插架三萬軸一一懸牙籤新若手未觸爲人強
記覽過眼不再讀偉哉羣聖文磊落載其腹行年五十餘出
守數已六京邑有舊廬不容久食宿臺閣多官員無地寄一
足我雖官在朝氣勢日局縮屢爲丞相言雖懇不見錄送行
過澹水東望不轉目今子從之遊學問得所欲入海觀龍魚
矯翮逐黃鵠勉爲新詩章月寄三四幅

南溪始泛三首

榜舟南山下上不得返幽事隨去多孰能量近遠陰沈過
連樹藏昂抵橫阪石麤肆磨礪波惡厭牽挽或倚偏岸漁竟
就平洲飯點點暮雨飄梢梢新月偃餘年懷無幾休日愴已
晚自是病使然非由取高蹇

南溪亦清駛而無機與舟山農驚見之隨我觀不休不惟兒
童輩或有杖白頭饋我籠中瓜勸我此淹畱我云以病歸此
已頗自由幸有用餘俸置居在西疇困倉米穀滿未有旦夕
憂上去無得得下來亦悠悠但恐煩里閭時有緩急投願爲
同社人雞豚燕春秋

足弱不能步自宜收朝蹟羸形可輿致佳觀安事擲卽此南

阪下久聞有水石，挖舟入其間。溪流正清澈，隨波吾未能。峻
瀨乍可刺，鷺起若導吾。前飛數十尺，亭亭柳帶沙。團團松冠
壁，歸時還盡夜。誰謂非事役？

會合聯句

愈 張籍
孟郊 張徹

離別言無期，會合意彌重。

籍

病添兒女戀，老喪丈夫勇。

愈 劍

心知未死時，思猶孤聳。

郊

愁去劇箭飛，歡來若泉湧。

徹

析言

多新貫，攄抱無昔壅。

籍

念難須勤退，悔易勿輕踵。

愈

吟巴山

犖

音

說楚波，堆壘

郊

馬辭虎豹怒，舟出蛟鼉恐。

徹

狂鯨時

孤軒幽，狘雜百種。

愈

瘴衣常腥膩，蠻器多疏冗。

籍

剝苔弔斑

林角飯，餌沈豕。

愈

忽爾銜遠命，歸歟舞新寵。

郊

鬼窟脫幽妖

天居覲清棋。

愈

京遊步方振，謫夢意猶恂。

籍

詩書誇舊知，酒

食接新奉

愈

嘉言寫清越瘡病失耽腫

郊

夏陰偶高庇宵魄

接虛擁

愈

雪弦寂寂聽茗盃纖纖捧

郊

馳輝燭浮螢幽響泄

潛蜚

愈

詩老獨何心江疾有餘燹

郊

我家本漚穀有地介皐

輦休跡憶沈冥峨冠慙聞晦

愈

升朝高轡逸振物羣聽悚徒

言濯幽泌誰與薙荒茸

籍

朝紳鬱青綠馬飾曜珪珙國讐未

銷鑠我志蕩邛隴

郊

君才誠倜儻時論方洵溶

音

格言多彪

蔚懸解無枯琴張生得淵源寒色拔山豕堅如撞羣金眇若

抽獨蛹

愈

伊余何所擬跛鼃詎能踊塊然墮岳石飄爾胥巢

翫

郊

龍旆垂天衛雲韶凝禁甬君胡眠安然朝鼓聲洶洶

愈

鬪雞聯句

孟郊

大雞昂然來小雞竦而待

愈

崢嶸顛盛氣洗刷凝鮮彩

郊

高

行若矜豪側睨如何殆

愈

精光目相射劒戟心獨在

郊既取

冠爲胃復以距爲鏃天時得清寒地利挾爽塏

愈

磔毛各噤

痒怒癭爭礮磊俄膺忽爾低植立瞥而改

郊

膈膊戰聲喧續

翻落羽矐中休事未決小挫勢益倍

愈

妬腸啓生敵賊性專

相醢裂血失鳴聲啄殷甚饑餒

郊

對起何急驚隨旋誠巧紿

毒手飽李陽神槌困朱亥

愈

惻心我以仁碎首爾何罪獨勝

事有然旁驚汗流浹

郊

知雄欣動顏怯負愁看賄爭觀雲填

道助教波翻海

愈

事爪深難解嗔晴時未忘一噴一醒然再

接再礪乃

郊

頭垂碎丹砂翼搨拖錦綵連軒尙賈餘清厲比

歸凱

愈

選俊感收毛受恩慙始隗英心甘鬪死義肉恥庖宰

君看鬪雞篇短韻有可采

郊

贈江華長老

柳宗元

老僧道機熟默語心皆寂去歲別春陵沿流此投跡室空無
侍者巾履唯挂壁一飯不願餘跣趺便終夕風牕疏竹響露
井寒松滴偶地卽安居滿庭芳草積

南礪中題

秋氣集南礪獨遊亭午時迴風一蕭瑟林影久參差始至若
有得稍深遂忘疲羈禽響幽谷寒藻舞淪漪去國魂已遠懷
人淚空垂孤生易爲感失路少所宜索寞竟何事徘徊祇自
知誰爲後來者當與此心期

覺衰

久知老將至不謂便見侵今年宜未衰稍已來相尋齒疏髮

就種奔走力不任咄此可奈何未必傷我心彭聃安在哉周
孔亦已沈古稱壽聖人曾不畱至今但願得美酒朋友常共
斟是時春向暮桃李生繁陰日照天正綠杳杳歸鴻吟出門
呼所親扶杖登西林高歌足自快商頌有遺音

韋道安

道安嘗佐張建封于徐州及軍亂而道安自殺

道安本儒士頗擅弓劍名二十遊太行暮聞號哭聲疾驅前
致問有叟垂華纓言我故刺史失職還西京偶爲羣盜得毫
縷無餘贏貨財足非恡二女皆娉婷蒼黃見驅逐誰識死與
生便當此殞命休復事晨征一聞激高義皆裂肝膽橫挂弓
問所往趨捷超崢嶸見盜寒礪陰羅列方忿爭一矢斃酋帥
餘黨號且驚麾令遞束縛縲索相拄撐彼姝久覩魄刃下俟

誅刑卻立不親授諭以從父行据收自擔肩轉道趨前程夜
發敲石火山林如晝明父子更抱持涕血紛交零頓首願歸
貨納女稱舅甥道安奮衣去義重利固輕師婚古所病合姓
非用兵竭來事儒術十載所能逞慷慨張徐州朱邸揚前旌
投驅獲所願前馬出王城轅門立奇士淮水秋風生君侯旣
卽世麾下相敬傾立孤抗王命鐘鼓四野鳴橫潰非所壅逆
節非所嬰舉頭自引刀願義誰顧形烈士不忘死所死在忠
貞咄嗟徇權子翕習猶趨榮我歌非悼死所悼時世情

旦攜謝山人至愚池

新沐換輕幘曉池風露清自諧塵外意況與幽人行霞散眾
山迴天高數雁鳴機心付當路聊適羲皇情

溪居

久爲簪組累幸此南夷謫閑依農圃鄰偶似山林客曉耕翻
露草夜榜響溪石來往不逢人長歌楚天碧

秋曉行南谷經荒村

杪秋霜露重晨起行幽谷黃葉覆溪橋荒村唯古木寒花疏
寂歷幽泉微斷續機心久已忘何事驚麋鹿

雨後曉行獨至愚溪北池

宿行散洲渚曉日明村塢高樹臨清池風驚夜來雨予心適
無事偶此成賓主

中夜起望西園值月上

覺聞繁露墜開戶臨西園寒月上東嶺泠泠疏竹根石泉遠

言言口房唐詩卷六
逾響山鳥時一喧倚楹遂至旦寂寞將何言

團扇歌

劉禹錫

團扇復團扇奉君清暑殿秋風入庭樹從此不相見上有乘鸞女蒼蒼蟲網遍明年入懷袖別是機中練

插田歌

并引

連州城下俯接村墟偶登郡樓適有所感遂書其事
爲俚歌以俟采詩者

岡頭花草齊燕子東西飛田塍望如線白水光參差農婦白紵裙農父綠蓑衣齊唱郢中歌嚶噀如竹枝但聞怨響音不辨俚語詞時時一大笑此必相嘲嗤水平苗漠漠煙火生墟落黃犬往復還赤雞鳴且啄路旁誰家郎烏帽衫袖長自言

上計吏年幼離帝鄉田夫語計吏君家儂定記一來長安道
眼大不相覷計吏笑致辭長安真大處省門高軻峨儂人無
度數昨來補衛士唯用筒竹布君看二三年我作官人去

畚田行

何處好畚田團團縵山腹鑽龜得雨卦上山燒臥木驚麝走
且顧羣雉聲咿喔紅焰遠成霞輕煤飛入郭風引上高岑獵
獵度青林青林望靡靡赤光低復起照潭出老蛟爆竹驚山
鬼夜色不見山孤明星漢間如星復如月俱逐曉風滅本從
敲石光遂至烘天熱下種暖灰中乘陽拆牙孽蒼蒼一雨後
茗潁如雲發巴人拱手吟耕耨不關心由來得地勢徑寸有
餘金

別友人後得書因以詩贈

前時送君去揮手青門橋路轉不相見猶聞馬蕭蕭今得出
關書行程日已遙春還遲君至共纈芳蘭苕

送張盥赴舉詩

并引

古人以偕受學爲同門友今人以偕升名爲同年友
其語熟見縉紳者皆道焉余與張盥爲丈人由是道
也曩吾見爾之始生以老成爲祝今吾見爾之成人
以未立爲憂吾不幸向所謂同年友當其盛時聯袂
齊鑣亘絕九衢若屏風然今來落落如晨星之相望
昔日會合不煩異席可長太息哉然而尙書右丞衛
大受兵部侍郎武廷碩二君者當時偉人咸萬夫之

望足以訂十朋之多也第如京師無騷騷爾無忻忻
爾時秋也吾爲若叩商之謳幸有感夫二君子

爾生始懸弧我作座上賓引箸舉湯餅祝詞天麒麟今成一
丈夫坎珂愁風塵長裾來謁我自號廬山人道舊與撫孤悁
然傷我神依依見眉睫嘿嘿含悲辛永懷同年友追想出谷
晨三十二君子齊飛凌煙旻曲江一會時後會已凋零況今
三十載閱世難重陳盛時一已過來者日日新不如搖落樹
重有明年春火後見琮璜霜餘識松筠肅風乃獨秀武部亦
絕倫爾今持我詩西見二重臣成賢必念舊保貴在安貧清
時爲丞郎氣力侔陶鈞乞取斗升米因之雲漢津

登司馬錯古城

將軍將秦師西北奠遐服故壘清江上蒼烟晦喬木登臨值
蕭辰周覽壯前躅塹平陳葉滿塘高秋蔓綠廢井抽寒菜毀
臺生穠穀耕人得古器宿雨多遺鏃楚塞鬱重疊蠻溪紛詰
曲畱此數仞基幾人傷遠目

客有爲余話登天壇遇雨之狀因以賦之

清晨登天壇半路逢陰晦疾行穿雨過卻立視雲背白日照
其上風雷走於內滉漾雪海翻槎牙玉山碎蛟龍露鬚鬣神
鬼含變態萬狀互生滅百音以繁會俯觀羣動靜始覺天宇
大山頂自晶明人間已霧霈豁然重昏斂渙若春冰潰反照
入松門瀑流飛縞帶遙光泛物色餘韻吟天籟洞府撞仙鐘
村墟起夕靄卻見山下侶已如迷世代問我何處來我來雲

雨外

遊子吟

自註迎母
溧上作

孟郊

慈母手中線遊子身上衣
臨行密密縫意恐遲遲歸
誰言寸草心報得三春暉

征婦怨

二首
之一

良人昨日去明月又不圓
別時各有淚零落青樓前
君淚濡羅巾妾淚滿路塵
羅巾長在手今得隨妾身
路塵如得風得上君車輪

前四句一本
別作一首

聞砧

杜鵑聲不哀斷猿啼不切
月下誰家砧一聲腸一絕
杵聲不爲客客聞髮自白
杵聲不爲衣欲令遊子歸

游終南龍池寺

飛鳥不到處僧房終南巔龍在水長碧雨開山更鮮步出白日
上坐依清溪邊地寒松桂短石險道路偏晚磬送歸客數
聲落遙天

贈別崔純亮

食齋腸亦苦強歌聲無歡出門卽有礙誰謂天地寬有礙非
遐方長安大道傍小人智慮險平地生太行鏡破不改光蘭
死不改香始知君子心交久道益彰君心與我懷離別俱迴
遑譬如浸蘖泉流苦已日長忍泣目易衰忍憂形易傷項籍
豈不壯賈生豈不良當其失意時涕泗各沾裳古人勸加餐
此餐難自強一飯九祝噎一嗟十斷腸況是兒女怨怨氣凌

彼蒼彼蒼若有知白日下清霜今朝始驚歎碧落空茫茫

送豆盧策歸別墅

短松鶴不巢高石雲不棲君今瀟湘去意與雲鶴齊力買奇
險地手開清淺溪身披薜荔衣山陟莓苔梯一卷冰雪文避
俗常自攜

送蕭鍊師入四明山

閑於獨鶴心大于高松年迴出萬物表高棲四明巔千尋直
裂峯百尺倒瀉泉絳雪爲我飯白雲爲我田靜言不語俗靈
蹤時步天

送韓愈從軍

志士感恩起變衣非變性親朋改舊觀僮僕生新敬坐作羣

書吟行爲孤劒詠始知出處心不失平生正淒淒天地秋凜
凜軍馬令驛塵時一飛物色極四靜王師旣不戰廟略在無
競王粲有所依元瑜初應命一章喻檄明百萬心氣定今朝
旌鼓前笑別丈夫盛

哭李觀

志士不得老多爲直氣傷阮公終日哭壽命固難長顏子旣
殂謝孔門無輝光文星落奇曜寶劒摧修鋸常作金應石忽
爲宮別商爲爾弔琴瑟斷弦難再張偏轂不可轉隻翼不可
翔清塵無吹噓委地難飛揚此義古所重此風今則亡自聞
喪元賓一日八九狂沈痛此丈夫驚呼彼穹蒼我有出俗韻
勞君疾惡腸知音旣已矣微言誰能彰旅葬無高墳栽松不

成行哀歌動寒日贈淚沾晨霜神理本窅窅今來更茫茫何
以蕩悲懷萬事付一觴

峽哀

十首
之一

上天下天水出地入地舟石劒相劈斫石波怒蛟虬花木疊
宿春風颿凝古秋幽怪窟穴語飛聞盼嚮流沈哀日已深銜
訴將何求

還自會稽歌

并序

李賀

庾肩吾於梁時嘗作宮體謠引以應和皇子及國勢
淪敗肩吾先潛難會稽後始還家僕意其必有遺文
今無得焉故作還自會稽歌以補其悲

野粉椒壁黃溼螢滿梁殿臺城應教人秋衾夢銅輦吳霜點

歸鬢身與塘蒲晚脈脈辭金魚羈臣守迤賤

詠懷

二首
之一

長卿懷茂陵綠草垂石井彈琴看文君春風吹鬢影梁王與
武帝棄之如斷梗惟畱一簡書今泥泰山頂

感諷

五首
之一

合浦無明珠龍洲無木奴足知造化力不給使君須越婦未
織作吳蠶始蠕蠕縣官騎馬來獐色虬紫鬚懷中一方板板
上數行書不因使君怒焉得詣爾廬越婦拜縣官桑牙今尙
小會待春日宴絲車方擲掉越婦通言語小姑具黃梁縣官
踏食去簿吏復登堂

七泉寺上方

王建

長年好名山本性今得從回看塵蹟遙梢見麋鹿蹤老僧雲
中居石門青重重陰泉養成龜古壁飛卻龍埽石禮新經懸
幡上高峯日夕猿鳥合覓食聽山鐘將火尋遠泉煮茶傍寒
松晚隨收藥人便宿南澗中晨起衝露行濕花枝茸茸歸依
向老衲願作無名翁

寄李益少監兼送張實遊幽州

大雅廢已久人倫失其常天若不生君誰復爲文綱迷者得
道路溺者遇舟航國風人已變山澤增輝光星辰有其位豈
合離帝傍賢人旣遐征鳳鳥安來翔少小慕高名所念隔山
岡集卷新紙封每讀常焚香古來難自達取鑑在賢良未爲
知音故徒恨名不彰諒無金石堅性命豈能長常恐一世中

言山房見言卷二
三
不上君子堂偉哉清河子少年志堅強篋中有素文千里求
發揚自顧音韻乖無由合宮商幸君達精誠爲我求回章

溫門山

早入溫門山羣峯亂如戟崩崖欲相觸呀豁斷行迹脫屣尋
淺流定足畏欹石路盡十里溪地多千歲柏洞門夜陰黑深
處惟石壁似見丹砂光亦聞鐘乳滴靈池出山底沸水衝地
脈暖氣成濕烟濛濛窗中白隨僧入古寺便成雲外客月出
天氣涼夜鐘山寂寂

題吾溪石

皇甫湜

次山有文章可惋只在碎然長於指敘約潔有餘態心語適
相應出句多分外於諸作者間拔戟成一隊中行雖富劇粹

美若可蓋子昂感遇佳未若君雅裁退之全而神上與千載
對李杜才海翻高下非可槩文於一氣間爲物莫與大先王
路不荒豈不仰吾輩石屏立衙衙溪口揚素瀨我思何人知
徙倚如有待

雜怨

張籍

切切重切切秋風桂枝折人當少年嫁我當少年別念君非
征行年年長遠途妾身甘獨歿高堂有舅姑山川豈遙遠行
人自不返

祭退之

嗚呼吏部公其道誠巍昂生爲大賢姿天使光我唐德義動
鬼神鑒用不可詳獨得雄直氣發爲古文章學無不該貫吏

治得其方三次論諍退其志亦剛強再使平山東不言所謀
臧薦待皆寒羸但取其才良親朋有孤稚婚姻有辦營如彼
天有斗人可爲信常如彼歲有春物宜得華昌哀哉未申施
中年遽殂喪朝野良共哀矧於知舊腸籍在江湖間獨以道
自將學詩爲眾體久乃溢笈囊略無相知人黯如霧中行北
遊偶逢公盛語相稱明名因天下聞傳者入歌聲公領試士
司首薦到上京一來遂登科不見苦貢場觀我性朴直乃言
及平生由茲類朋黨骨肉無以當坐令其子拜常呼幼時名
追招不隔日繼踐公之堂出則連轡馳寢則對榻牀搜窮古
今書事事相酌量有花必同尋有月必同望爲文先見草釀
熟皆共觴新果及異鮭無不相待嘗到今三十年曾不少異

更公文爲時師我亦有微聲而後之學者或號爲韓張我官
麟臺中公爲大司成念此委末秩不能力自揚特狀爲博士
始獲升朝行未幾享其資遂忝南宮郎是事賴拯扶如屋有
棟梁去夏公請告養疾城南莊籍時官休罷兩月同游荆黃
子陂岸曲地曠氣色清新池四平漲中有蒲荇香北臺臨稻
疇茂柳多陰涼板亭坐垂釣煩苦稍已平共愛池上佳聯句
舒遐情偶有賈秀才來茲亦同并移船入南溪東西縱篙撐
劃波激船舷前後飛鷗鷺回入潭瀨下網截鯉與魴踏沙掇
水蔬樹下蒸新杭日來相與嬉不知暑日長柴翁攜童兒聚
觀於岸傍月中登高灘星漢交垂芒釣車擲長綫有獲齊歡
驚夜闌乘馬歸衣上草露光公爲遊谿詩唱詠多慷慨自期

此可老結社于其鄉籍受新官詔拜恩當入城公因同歸還
居處隔一坊中秋十六夜魄圓天差晴公旣相邀畱坐語於
階楹乃出二侍女合彈琵琶箏臨風聽繁絲忽遽聞再更顧
我數來過是夜涼難忘公病浸日加孺人視藥湯來候不得
宿出門每迴遑自是將重危車馬候縱橫門僕皆逆遣獨我
到寢房公有曠達識生死爲一網及當臨終晨意色亦不荒
贈我珍重言傲然委衾裳公比欲爲書遺約有修章令我署
其末以爲後事程家人號於前其書不果成子符奉其言甚
於親使令魯論未訖注手跡今微茫新亭成未登閉在莊西
廂書札與詩文重疊我筭盈頃息萬事盡腸情多摧傷舊塋
盟津北野窳動鼓鉦柳車一出門終天無迴箱籍貧無贈貲

曷用申哀誠衣器陳下帳醪餌奠堂皇明靈庶鑒知髣髴斯
來饗

朝饑

賈島

市中有樵山此舍朝無煙井底有甘泉釜中乃空然我要見
白日雪來塞青天坐聞西牀琴凍折兩三弦饑莫詣他門古
人有拙言

茶山詩

袁高

禹貢通遠俗所圖在安人後王失其本職吏不敢陳亦有姦
佞者因茲欲求伸動生千金費日使萬姓貧我來顧渚源得
與茶事親毗輟耕農耒采采實苦辛一夫旦當役盡室皆同
臻捫葛上欹壁蓬頭入荒榛終朝不盈掬手足皆鱗皴悲嗟

言雪山房唐詩卷六終
遍空山草木爲不春陰嶺芽未吐使者牒已頻心爭造化功
走挺麋鹿均選納無晝夜搗聲昏繼晨眾工何枯樞俯視彌
傷神皇帝尙巡狩東郊路多堙周迴遶天涯所獻愈艱勤況
減兵革困重茲固疲民未知供御餘誰合分此珍顧省忝邦
守又慙復因循茫茫滄海間丹憤何由申

合江亭檻前多高竹不見遠岸花客命翦之感而成詠

呂溫

吉凶豈前卜人事何翻覆緣看數日花卻翦凌霜竹常言契
君操今乃妨眾目自古病當門誰言出幽獨

讀雪山房唐詩卷六終

讀雪山房唐詩卷七

小傳五

目錄一

詩廿三

詩人小傳

七

白居易

字樂天，下邳人。貞元中擢進士第，補校書郎。元和

初，對制策入等，調盩厔尉，集賢校理。尋召爲翰林
學士，左拾遺，拜贊善大夫，以言事貶江州司馬、徙
忠州刺史。穆宗初，徵爲主客郎中，知制誥。復乞外，
歷杭、蘇二州刺史。文宗立，以秘書監召，遷刑部侍
郎。俄移病，除太子賓客分司。東都拜河南尹，開成
初，起爲同州刺史，不拜，改太子少傅。會昌初，以刑
部尚書致仕。卒，贈尚書右僕射，諡曰文白。號醉吟
先生，亦稱香山居士。與同年元稹、酬詠，號元白與

劉禹錫酬詠號劉白長慶集詩二十卷後集詩十七卷別集補遺二卷今鈔五古廿五首七古十七首五律九首七律廿九首五排九首五絕三首七絕廿二首

張

碧

字太碧貞元時人孟郊甚推許之今鈔五古一首

鮑

溶

字德源元和進士第與韓愈李正封孟郊友善集

五卷今鈔五古三首七古一首七律二首七絕二首

李商隱

字義山懷州河內人令狐楚帥河陽奇其文使與

諸子游楚徙天平宣武皆表署巡官開成二年高
銛知貢舉令狐綯雅善銛獎譽甚力故擢進士第

調弘農尉以忤觀察使罷去尋復官又試拔萃中
選王茂元鎮河陽愛其才表掌書記以子妻之得
侍御史茂元死來游京師久不調更依桂管觀察
使鄭亞府爲判官亞謫循州商隱從之凡三年乃
歸茂元與亞皆李德裕所善絢以商隱爲忘家恩
謝不通京兆尹盧弘正表爲府參軍典箋奏絢當
國商隱歸窮自解絢憾不置弘正鎮徐州表爲掌
書記久之還朝復干絢乃補太學博士柳仲郢節
度劔南東川辟判官檢校工部員外郎府罷客滎
陽卒商隱初爲文瑰邁奇古及在令狐楚府楚本
工章奏因授其學商隱儷偶長短而繅繹過之時

溫庭筠段成式俱用是相誇號三十六體樊南甲
集二十卷乙集二十卷玉溪生詩三卷今鈔五古
一首七古二首五律十五首七律四十二首五排
十首五絕六首七絕卅五首

溫庭筠

本名岐字飛卿太原人宰相彥博裔孫少敏悟才
思豔麗韻格清拔工爲詞章小賦與李商隱皆有
名稱溫李然行無檢幅數舉進士不第思神速每
入試押官韻作賦凡八义手而成時號溫八义徐
商鎮襄陽署爲巡官不得志去歸江東後商知政
事頗右之欲白用會商罷相楊收疾之貶方城尉
再遷隋縣尉卒集二十八卷今鈔五古三首七古

三首五律六首七律十七首五排四首七絕十二首

杜牧

字牧之京兆萬年人太和二年擢進士第復舉賢良方正沈傳師表爲江西團練府巡官又爲牛僧孺淮南節度府掌書記擢監察御史移疾分司東都弟顥病棄官復爲宣州團練判官拜殿中侍御史內供奉累遷左補闕史館修撰改膳部員外郎歷黃池睦三州刺史入爲司勳員外郎常兼史職改吏部復乞爲湖州刺史踰年拜考功郎中知制誥遷中書舍人卒牧剛直有奇節不爲齷齪小謹敢論列大事指陳病利尤切其詩情致豪邁人

號爲小牡以別甫云樊川詩四卷外集詩一卷別集詩一卷今鈔五古一首五律五首七律十首五排三首五絕二首七絕廿四首

趙嘏

字承祐山陽人會昌二年登進士第大中間仕至渭南尉卒嘏爲詩瞻美多興味杜牧愛其長笛一聲人倚樓之句吟歎不已人因目爲趙倚樓有渭南集三卷編年詩二卷今鈔五古一首七律三首五絕一首七絕五首

劉皐

宣宗時鹽州刺史爲監軍楊玄价所殺詩二首

劉駕

字司南江東人登大中進士第官國子博士今鈔

五古二首

曹鄴

字業之桂州人登大中進士第由天平幕府遷太常博士歷祠部郎中洋州刺史今鈔五古二首七

律一首

于瀆

字子漪咸通進士終泗州判官今鈔五古二首五

絕二首

聶夷中

字坦之河東人咸通十二年登第官華陰尉今鈔五古一首五絕一首

皮日休

字襲美一字逸少襄陽人性傲誕隱居鹿門自號間氣布衣咸通八年登進士第崔璞守蘇辟軍事判官入朝授太常博士黃巢陷長安僞署學士使爲識文疑其譏已遂及禍集二十八卷今鈔五古

四首五律一首七律七首七絕二首

陸龜蒙

字魯望蘇州人元方七世孫舉進士不第辟蘇湖

二郡從事退隱松江甫里多所論撰自號天隨子

以高士召不赴李蔚盧攜素重之及當國召拜拾

遺詔方下卒光化中贈右補闕集二十卷今鈔五

古六首七古一首七律四首五絕四首七絕六首

李冶

字季蘭女冠也吳興人今鈔五古一首七古一首

五律三首

吳筠

字貞節華州華陰人少通經善屬文舉進士不第

去入嵩山爲道士明皇聞其名遣使徵至待詔翰

林天寶中堅求還山尋入會稽隱剡中大厯中卒

弟子私謚爲宗玄先生集十卷今鈔五古一首

寒山

不知何許人居天台唐興縣寒巖時往還國清寺
以樺皮爲冠布裘弊履或長廊唱詠或村墅歌嘯
人莫識之閭邱稍宦丹邱臨行遇豐干師言從天
台來閭邱問彼地有何賢堪師師曰寒山文殊拾
得普賢在國清寺庫院厨中著火閭邱到官三日
親往寺中見二人便禮拜二人大笑曰豐干饒舌
饒舌阿彌不識禮我何爲卽走出寺歸寒巖寒山
子入穴而去其穴自合嘗於竹木石壁書詩并村
墅屋壁所寫三百餘首今鈔五古二首

維其維之 以之維之 以之維之

于其維之 以之維之 以之維之

維其維之 以之維之 以之維之

維其維之 以之維之 以之維之

維其維之 以之維之 以之維之

維其維之 以之維之 以之維之

維其維之 以之維之 以之維之

維其維之 以之維之 以之維之

維其維之 以之維之 以之維之

維其維之 以之維之 以之維之

讀雪山房唐詩卷七

五古目錄七

白居易廿六首

張碧一首

鮑溶三首

李商隱一首

溫庭筠三首

杜牧一首

趙嘏一首

劉皐一首

劉駕二首

曹鄴二首

于濆二首

聶夷中一首

皮日休四首

陸龜蒙六首

李冶一首

吳筠一首

寒山二首

卷一

山

卷二

水

卷三

風

卷四

雅

卷五

頌

卷六

風

卷七

雅

卷八

頌

讀雪山房唐詩卷七

五古_七

讀張籍古樂府

白居易

張君何爲者業文三十春尤工樂府詩舉代少其倫爲詩意
如何六義互鋪陳風雅比興外未嘗著空文讀君學仙詩可
諷放佚君讀君董公詩可誨貪暴臣讀君商女詩可感悍婦
仁讀君勤齊詩可勸薄夫敦上可裨教化舒之濟萬民下可
理性情卷之善一身始從青衿歲迨此白髮新日夜秉筆吟
心苦力亦勤時無采詩官委棄如泥塵恐君百歲後滅没人
不聞願藏中祕書百代不淹淪願播內樂府時得聞至尊言
者志之苗行者文之根所以讀君詩亦知君爲人如何欲五

十官小身賤貧病眼街西住無人行到門

凶宅

長安多大宅列在街西東往往朱門內房廊相對空梟鳴松
桂樹狐藏蘭菊叢蒼苔黃葉地日暮多旋風前主爲將相得
罪竄巴庸後主爲公卿寢疾歿其中連延四五主殃禍繼相
鍾自從十年來不利主人翁風雨壞檐隙蛇鼠穿牆墉人疑
不敢買日毀土木功嗟嗟俗人心甚矣其愚蒙但恐災將至
不思禍所從我今題此詩欲悟迷者胸凡爲大官人年祿多
高崇權重持難久位高勢易窮驕者物之盈老者數之終四
者如寇盜日夜來相攻假使居吉土孰能保其躬因小以明
大借家可喻邦周秦宅殺函其宅非不同一興八百年一死

望夷宮寄語家與國人凶非宅凶

雜興

三首
之一

楚王多內寵傾國選嬪妃又愛從禽樂馳騁每相隨錦韉臂
花隼羅袂控金羈遂習宮中女皆如馬上兒色禽合爲荒刑
政兩已衰雲夢春仍獵章華夜不歸東風二月天春燕正離
離美人挾銀鐫一發疊雙飛飛鴻驚斷行斂翅避蛾眉君王
顧之笑弓箭生光輝迴眸語君曰昔聞莊王時有一愚夫人
其名曰樊姬不有此遊樂三載斷鮮肥

宿紫閣山北村

晨遊紫閣峯暮宿山下村村老見余喜爲余開一尊舉杯未
及飲暴卒來入門紫衣挾刀斧草草十餘人奪我席上酒掣

言山房詩卷七 二
我盤中餐主人退後立斂手反如賓中庭有奇樹種來三十
春主人惜不得持斧斷其根口稱采造家身屬神策軍主人
慎勿語中尉正承恩

贈樊著作

陽城爲諫議以正事其君其手如屈軼舉必指佞臣卒使不
仁者不得秉國鈞元稹爲御史以直立其身其心如肺石動
必達窮民東川八十家冤憤一言伸劉闢肆亂心殺人正紛
紛其嫂曰庾氏棄絕不爲親從史萌逆節隱心潛負恩其佐
曰孔戡捨去不爲賓凡此士與女其道天下聞常恐國史上
但記鳳與麟賢者不爲名名彰教乃敦每惜若人輩身死名
亦淪君爲著作郎職廢志空存雖有良史才直筆無所申何

不自著書實錄彼善人編爲一代言以備史闕文

感鶴

鶴有不羣者飛飛在野田飢不啄腐鼠渴不飲盜泉貞姿自耿介雜鳥何翩翾同遊不同志如此十餘年一興嗜慾念遂爲矰繳牽委質小池內爭食羣雞前不惟懷稻梁兼亦競腥羶不惟戀主人兼亦狎鳥鳶物心不可知天性有時遷一飽尙如此況乘大夫軒

寄唐生

賈誼哭時事阮籍哭路岐唐生今亦哭異代同其悲唐生者何人五十寒且飢不悲口無食不悲身無衣所悲忠與義悲甚則哭之太尉擊賊曰

段太尉以笏擊朱泚

尙書叱盜時

顏尙書叱李希烈

大

夫死兇寇

陸大夫爲亂兵所害

諫議謫蠻夷

陽諫議左遷道州

每見如此事聲

發涕輒隨往往聞其風俗事猶或非憐君頭半白其志竟不

衰我亦君之徒鬱鬱何所爲不能發聲哭轉作樂府詩篇篇

無空文句句必盡規功高虞人箴痛甚騷人辭非求宮律高

不務文字奇惟歌生民病願得天子知未得天子知甘受時

人嗤藥良氣味苦琴澹音聲稀不懼權豪怒亦任親朋譏人

竟無奈何呼作狂男兒每逢羣盜息或遇雲霧披但自高聲

歌庶幾天聽卑歌哭雖異名所感則同歸寄君三十章與君

爲哭詞

鄧魴張徹落第

古琴無俗韻奏罷無人聽寒松無妖花枝下無人行春風十

二街軒騎不暫停奔車看牡丹走馬聽秦箏眾目悅芳豔松
獨守其貞眾耳喜鄭衛琴亦不改聲懷哉二夫子念此無自
輕

秦中吟十首

并序

貞元元和之際予在長安聞見之間有足悲者因直
歌其事命爲秦中吟

議婚

天下無正聲悅耳卽爲娛人間無正色悅目卽爲姝顏色非
相遠貧富則有殊貧爲時所棄富爲時所趨紅樓富家女金
縷繡羅襦見人不斂手嬌癡二八初母兄未開口已嫁不須
與綠窗貧家女寂寞二十餘荆釵不直錢衣上無真珠幾迴

人欲聘臨日又踟躕主人會良媒置酒滿玉壺四座且勿飲
聽我歌兩途富家女易嫁嫁早輕其夫貧家女難嫁嫁晚孝
于姑聞君欲娶婦娶婦意何如

重賦

厚地植桑麻所要濟生民生民理布帛所求活一身身外充
征賦上以奉君親國家定兩稅本意在愛人厥初防其淫明
敕內外臣稅外加一物皆以枉法論奈何歲月久貪吏得因
循浚我以求寵斂索無冬春織絹未成匹繰絲未盈斤里胥
迫我納不許暫逡巡歲暮天地閉陰風生破村夜深煙火盡
霰雪白紛紛幼者形不蔽老者體無溫悲喘與寒氣并入鼻
中辛昨日輸殘稅因窺官庫門繒帛如山積絲絮如雲屯號

爲羨餘物隨月獻至尊奪我身上煖買爾眼前恩
進入瓊林庫歲久化爲塵

傷宅

誰家起甲第朱門大道邊豐屋中櫛比高牆外迴環纍纍六
七堂棟宇相連延一堂費百萬鬱鬱起青煙洞房溫且清寒
暑不能干高堂虛且迴坐臥見南山繞廊紫藤架夾砌紅藥
欄攀枝摘櫻桃帶花移牡丹主人此中坐十載爲大官府有
臭敗肉庫有貫朽錢誰能將我語問爾骨肉間豈無窮賤者
忍不救飢寒如何奉一身直欲保千年不見馬家宅今作奉
誠園

傷友

陋巷孤寒士出門苦恹恹雖云志氣高豈免顏色低平生同
門友通籍在金閨曩者膠漆契爾來雲雨睽正逢下朝歸軒
騎五門西是時天久陰三日雨淒淒蹇驢避路立肥馬當風
嘶迴頭忘相識占道上沙隄昔年洛陽社貧賤相提攜今日
長安道對面隔雲泥近日多如此非君獨慘悽死生不變者

唯聞任與黎

任公叔
黎達

不致仕

七十而致仕禮法有明文何乃貪榮者斯言如不聞可憐八
九十齒墮雙眸昏朝露貪名利夕陽憂子孫挂冠顧翠綬懸
車惜朱輪金章腰不勝偃僂入君門誰不愛富貴誰不戀君
恩年高須告老名遂合退身少時共嗤訕晚歲多因循賢哉

漢二疏彼獨是何人寂寞東門路無人繼去塵

立碑

勲德既下衰文章亦陵夷但見山中石立作路傍碑銘勲悉
太公敘德皆仲尼復以多爲貴干言直萬貫爲文彼何人想
見下筆時但欲愚者悅不思賢者嗤豈獨賢者嗤仍傳後代
疑古石蒼苔字安知是媿詞我聞望江縣麴令撫惇嫠麴令名信
陵在官有仁政名不聞京師身歿欲歸葬百姓遮路岐攀轅
不得歸畱葬此江湄至今道其名男女涕皆垂無人立碑碣
唯有邑人知

輕肥

意氣驕滿路鞍馬光照塵借問爲何者人稱是內臣朱紱皆

言山房集詩卷一
大夫紫綬或將軍誇赴軍中宴走馬去如雲尊罍溢九醞水
陸羅八珍果擘洞庭橘膾切天池鱗食飽心自若酒酣氣益
振是歲江南旱衢州人食人

五絃

清歌且罷唱紅袂亦停舞趙叟抱五絃宛轉當宵撫大聲麤
若散颯颯風和雨小聲細欲絕切切鬼神語又如鵲報喜轉
作猿啼苦十指無定音顛倒宮徵羽坐客聞此聲形神若無
主行客聞此聲駐足不能舉嗟嗟俗人耳好今不好古所以
緣牕琴日日生塵土

歌舞

秦中歲云暮大雪滿皇州雪中退朝者朱紫盡公侯貴有風

雪興富無飢寒憂所營唯第宅所務在追遊朱門車馬客紅
燭歌舞樓歡酣促密坐醉煖脫重裘秋官爲主人廷尉居上
頭日中爲一樂夜半不能休豈知閹鄉獄中有凍死囚

買花

帝城春欲暮喧喧車馬度共道牡丹時相隨買花去貴賤無
常價酬值看花數灼灼百朵紅菱菱五束素上張幄幕庇旁
織巴籬護水灑復泥封移來色如故家家習爲俗人人迷不
悟有一田舍翁偶來買花處低頭獨長歎此歎無人喻一叢
深色花十戶中人賦

禁中寓直夢遊仙遊寺

西軒草詔暇松竹深寂寂月出清風來忽似山中夕因成西

南夢夢作遊仙客覺聞宮漏聲猶謂山泉滴

遊悟真寺詩

一百三十韻

元和九年秋八月月上弦我游悟真寺寺在王順山去山四五里先聞水潺湲自茲舍車馬始涉藍溪灣手拄青竹杖足蹋白石灘漸怪耳目曠不聞人世喧山下望山上初疑不可攀誰知中有路盤折通巖巔一息幡竿下再休石龕邊龕間長丈餘門戶無扃關仰窺不見人石髮垂若鬟驚出白蝙蝠雙飛如雪翻回首寺門望青厓夾朱軒如擘山腹開置寺于其間入門無平地地窄虛空寬房廊與臺殿高下隨峯巒巖崿無撮土樹木多瘦堅根株抱石長屈曲蟲蛇蟠松桂亂無行四時鬱芊芊枝梢嫋清吹韻若風中絃日月光不透綠陰

相交延幽鳥時一聲聞之似寒蟬首憩賓位亭就坐未及安
須臾開北戶萬里明豁然越檐虹霏微遶棟雲回旋赤日間
白雨陰晴同一川野綠簇草樹眼界吞秦原渭水細不見漢
陵小于拳卻顧來時路縈紆映朱闌厯厯上山人一遙可
觀前對多寶塔風鐸鳴四端欒櫨與戶牖恰恰金碧繁云昔
伽葉佛此地坐涅槃至今鐵鉢在當底手迹穿西開玉像殿
白佛森比肩抖擻塵埃衣禮拜冰雪顏疊霜爲袈裟貫電爲
華鬘逼觀疑鬼功其迹非雕鐫次登觀音堂未到聞旃檀上
階脫雙履歛足升瑤筵六楹排玉鏡四座敷金鈿黑夜自光
明不待燈燭然眾寶互低昂碧佩珊瑚旛風來似天樂相觸
聲珊珊白珠垂露凝赤珠滴血殷點綴佛髻上合爲七寶冠

雙瓶白琉璃色若秋水寒隔瓶見舍利圓轉如金丹玉笛何
代物天人施祇園吹如秋鶴聲可以降靈仙是時秋方中三
五月正圓寶堂豁三門金魄當其前月與寶相射晶光爭鮮
妍照人心骨冷竟夕不欲眠曉尋南塔路亂竹低嬋娟林幽
不逢人寒蝶飛翩翩山果不識名離離夾道蕃足以療飢乏
摘嘗味甘酸道南藍谷神紫傘白紙錢若歲有水旱詔使修
蘋蘩以地清淨故獻奠無葷羶危石疊四五蟲鬼歆且刳造
物者何意堆在巖東偏冷滑無人跡苔點如花牋我來登上
頭下臨不測淵目眩手足掉不敢低頭看風從石下生薄人
而上搏衣服似羽翮開張欲飛騫巉巉三面峯峯尖刀劒攢
往往白雲過決開露青天西北日落時夕暉紅團團千里翠

屏外走下丹砂丸東南月上時夜氣青漫漫百丈碧潭底寫
出黃金盤藍水色似藍日夜長潺潺周回繞山轉下視如青
環或鋪爲漫流或激爲奔湍泓澄最深處浮出蛟龍涎側身
入其中懸磴尤險艱捫蘿躡樛木下逐飲澗猿雪迸起白鷺
錦跳驚紅鱸歇定方盥漱濯去肢體煩淺深皆洞徹可照腦
與肝但愛清見底欲尋不知源東崖饒怪石積甃蒼琅玕溫
潤發于外其間韞璵璠卞和死已久良玉多棄捐或時洩光
彩夜與星月連中頂最高峯拄天青玉竿颺颺上不得豈我
能攀援上有白蓮池素葩覆清瀾聞名不可到處所非人寰
又有一片石大如方尺輒插在半壁上其下萬仞懸云有過
去師坐得無生禪號爲定心石長老世相傳卻上謁仙祠蔓

草生綿綿昔聞王氏子羽化升上元其西曬藥臺猶對芝朮
田時復明月夜上聞黃鶴言迴尋畫龍堂二叟鬢髮班想見
聽法時歡喜禮印壇復歸泉窟下化作龍蜿蜒階前石孔在
欲雨生白烟往有寫經僧身靜心精專感彼雲外鴿羣飛千
翩翩來添硯中水去吸巖底泉一日三往復時節長不憊經
成號聖僧弟子名揚難誦此蓮花偈數滿百億千身壞口不
壞舌根如紅蓮顱骨今不見石函尙存焉粉壁有吳畫筆彩
依舊鮮素屏有褚書黑色如新乾靈境與異跡周覽無不殫
一遊五晝夜欲返仍盤桓我本山中人誤爲時綱牽率率使
讀書推挽令効官旣登文字科又忝諫諍員拙直不合時無
益同素餐以此自慙惕感感常寡歡無成心力盡未老形骸

殘今來脫簪組始覺離憂患及爲山水遊彌得縱疏頑野麋
斷羈絆行走無拘攣池魚放入海一往何時還身著居士衣
手把南華篇終來此山住永謝區中緣我今四十餘從此終
身閑若以七十期猶得三十年

舟行

江舟路上作

帆影日漸高閑眠猶未起起問鼓枻人已行三十里船頭有
行竈炊稻烹紅鯉飽食起婆娑盥漱秋江水平生滄浪意一
旦來遊此何況不失家舟中載妻子

長慶二年七月自中書舍人出守杭州路次藍溪作

太原一男子自顧庸且鄙老逢不次恩洗拔出泥滓旣居可
言地願助朝廷理伏閤三上章慙愚不稱旨聖人存大體優

言山房集卷十
一
貸容不死鳳詔停舍人魚書除刺史冥懷齊寵辱委順隨行
止我自得此心于茲十年矣餘杭乃名郡郡郭臨江汜已想
海門山潮聲來入耳昔予貞元末羈旅曾遊此甚覺太守尊
亦諳魚酒美因生江海興每羨滄浪水尙擬拂衣行況今兼
祿仕青山峯巒接白日煙塵起東道旣不通改轅遂南指自
秦窮楚越浩蕩五千里聞有賢主人而多好山水是行頗爲
愜所歷良可紀策馬度藍溪勝遊從此始

寄微之三首

江州望通州天涯與地末有山萬丈高有江千里闊間之以
雲霧飛鳥不可越誰知千古險爲我二人設通州君初到鬱
鬱愁如結江州我方去迢迢行未歇道路日乖隔音信日斷

絕因風欲寄語地遠聲不徹生當復相逢死當從此別
君遊襄陽日我在長安住今君在通州我過襄陽去襄陽九
里郭樓堞連雲樹顧此稍依依是君舊遊處蒼茫蒹葭水中
有潯陽路此去更相思江西少親故

去國日已遠喜逢物似人如何含此意江上坐思君有如河
嶽氣相合方氛氲狂風吹中絕兩處成孤雲風迴終有時雲
合豈無因努力各自愛窮通爾我身

郡齋旬假始命宴呈座客示郡寮

公門日兩衙公假月三旬衙用決簿領旬以會親賓公多及
私少勞逸常不均況爲劇郡長安得閑宴頻下車已二月開
筵始今晨初黔軍厨突一拂郡榻塵旣備獻酬禮亦具水陸

珍萍醅箸溪醕水鱸松江鱗
脩食樂懸動佐歡妓席陳風流
吳中客佳麗江南人歌節點
隨袂舞香遺在茵清奏凝未闕
酡顏氣已春眾賓勿遽起羣寮
且逡巡無輕一日醉用犒九
日勤微彼九日勤何以治吾民
微此一日醉何以樂吾身

山居雨霽卽事

一作長孫
佐輔詩

張碧

結茅蒼嶺下自與喧卑隔
况值雷雨晴郊原轉岑寂
出門看反照繞屋殘溜滴
古路絕人行荒陂響螻蝻
籬崩瓜豆蔓圃壞牛羊跡
斷續古祠鴉高低遠村笛
喜聞東臯潤欲往未通屐
杖策試危橋攀蘿瞰苔壁
隣翁夜相訪緩酌聊破石
新月出汗尊浮雲在巾舄
常隳腐儒操謬習經邦畫
有待時未知非關慕沮溺

壯士行

鮑溶

西方太白高壯士羞病死心知報恩處對酒歌易水沙鴻嗥
天末橫劒別妻子蘇武執節歸班超束書起山河不足重重
在遇知己

舊鏡

嬋娟本家鏡與妾歸君子每憶並照時相逢明月裏春風忽
分影白日難依倚珠粉不結花玉璫寧輝耳心期不可見不
保長如此華髮一欺人青銅化爲鬼良人有歸日肯學妖桃
李瑤匣若浮雲冥冥藏玉水侍兒不遺照恐學孤鸞死

羽林行

朝出羽林宮入參雲臺議獨請萬里行不奏和親事君王重

言山房詩卷一
三
年少深納開邊利寶馬雕玉鞍一朝從萬騎煌煌都門外祖
帳光七貴歌鐘樂行軍雲物慘別地簫笳整部曲幢蓋動郊
次臨風親戚懷滿袖兒女淚行行復何贈長劒報恩字

行次西郊作一百韻

李商隱

蛇年建午月我自梁還秦南下大散關北濟渭之濱草木半
舒坼不類冰雪晨又若夏苦熱焦卷無芳津高田長檨樾下
田長荆榛農具棄道旁飢牛死空墩依依過村落十室無一
存存者皆面啼無衣可迎賓始若畏人問及門還具陳右輔
田疇薄斯民常苦貧伊昔稱樂土所賴牧伯仁官清若冰玉
吏善如六親生兒不遠征生女事四鄰濁酒盈瓦缶爛穀堆
荆困健兒庇旁婦衰翁舐童孫況自貞觀後命官多儒臣例

以賢牧伯徵入司陶鈞降及開元中姦邪撓經綸晉公忌此事多錄邊將勳因令猛毅輩雜牧升平民中原遂多故除授非至尊或出倖臣輩或由帝戚恩中原因屠解奴隸厭肥豚皇子棄不乳椒房抱羌渾重賜竭中國強兵臨北邊控弦二十萬長臂皆如猿皇都三千里來往同雕鷲五里一換馬十里一開筵指顧動白日煖熱迴蒼旻公卿辱嘲叱唾棄如糞丸大朝會萬方天子正臨軒綵旂轉初旭玉坐當祥煙金障旣特設珠簾亦高褰捋須蹇不顧坐在御榻前忤者死艱屢附之升頂顛華侈矜遞街豪俊相併吞因失生惠養漸見徵求頻奚寇西北來揮霍如天翻是時正忘戰重兵多在邊列城遶長河平明插旗旛但聞虜騎入不見漢兵屯大婦抱兒

哭小婦攀車轡生小太平年不識夜閉門少壯盡黠行疲老
守空邨生分作死誓揮淚連秋雲廷臣例麀怯諸將如羸奔
爲賊埽上陽捉人送潼關玉輦望南斗未知何日旋誠知開
闢久邁此雲雷屯送者問鼎大存者要高官搶攘互間謀孰
辨梟與鸞千馬無返轡萬車無還轅城空鼠雀死人去豺狼
喧南資竭吳越西費失河源因令左藏庫摧毀惟空垣如人
當一身有左無右邊筋體半痿痺肘腋生臊膻列聖蒙此恥
含懷不能宣謀臣拱手立相戒無敢先萬國困杼軸內庫無
金錢健兒立霜雪腹歉衣裳單饋餉多過時高估銅與鉛山
東望河北爨煙猶相聯朝廷不暇給辛苦無半年行人權行
資居者稅屋椽中間遂作梗狼籍用戈鋌臨門送節制以錫

通天班破者以族滅存者尙遷延禮數異君父羈縻如羌零
直求輸赤誠所望大體全巍巍政事堂宰相厭八珍敢問下
執事今誰掌其權瘡疽幾十載不敢扶其根國蹙賦更重人
稀役彌繁近年牛醫兒城社更扳援盲目把大旆處此京西
藩樂禍忘怨敵樹黨多狂狷生爲人所憚死非人所憐快刀
斷其頭列若猪牛懸鳳翔三百里兵馬如黃巾夜半軍牒來
屯兵萬五千鄉里駭供億老少相扳牽兒孫生未孩棄之無
慘顏不復議所適但欲死山間爾來又三歲甘澤不及春盜
賊亭午起問誰多窮民節使殺亭吏捕之恐無因咫尺不相
見旱久多黃塵官健腰佩弓自言爲官巡常恐值荒迥此輩
還射人媿客問本末願客無因循鄘塢抵陳倉此地忌黃昏

我聽此言罷冤憤如相焚昔聞舉一會羣盜爲之奔又聞理
與亂在人不在天我願爲此事君前剖心肝叩頭出鮮血滂
沱污紫宸九重黯已隔涕泗空沾唇使典作尙書廝養爲將
軍慎勿道此言此言未忍聞

西州詞

吳聲

溫庭筠

悠悠復悠悠昨日下西州西州風色好遙見武昌樓武昌何
鬱鬱儂家定無匹小婦被流黃登樓撫瑤瑟朱絃繁復輕素
手直淒清一彈三四解掩抑似含情南樓登且望西江廣復
平艇子搖兩槳催過石頭城門前烏桕樹慘澹天將曙鵝鵝
飛復還郎隨早帆去迴頭語同伴定復負情儂去帆不安幅
作抵使西風他日相尋索莫作西州客西州人不歸春草年

年碧

俠客行

欲出鴻都門陰雲蔽城闕
寶劒黯如水微紅溼餘血
白馬夜頻驚三更霸陵雪

鴻臚寺有開元中錫宴堂
樓臺池沼雅爲勝絕荒涼
遺址僅有存者偶成四十韻

明皇昔御極神聖垂耿光
沈機發雷電逸躅陵堯湯
西覃積石山北至窮髮鄉
四凶有獬豸一臂無螳螂
嬋娟得神豔郁烈聞國香
紫綵鳴羯鼓玉管吹霓裳
祿山未封侯林甫才爲郎
昭融廓日月妥帖安紀綱
羣生到壽域百辟趨明堂
四海正夷宴一塵不飛揚
天子自猶豫侍臣宜樂康
軋然闔闔開

赤日生扶桑玉砌露盤紆金壺漏丁當劒佩相擊觸左右隨
趨踰元珠十二旒紅粉三千行顧盼生羽翼叱嗟迴雪霜神
霞凌雲閣春水驪山陽盤鬪九子粳甌擎五雲漿雙瓊京兆
傅七鼓邯鄲娼毬毬碧雞鬪龍蔥翠雉場仗官繡蔽膝寶馬
金縷錫椒塗隔鸚鵡柘舞驚鴛鴦猗歟華國臣鬢髮俱蒼蒼
錫宴得幽致車從真煒煌畫鷁照魚鼈鳴騶亂驚鷗颺灩蕩
碧波炫煌迷橫塘縈盈舞迴雪宛轉歌遶梁豔帶畫銀絡寶
梳金鈿筐沈冥類漢相醉倒疑楚狂一旦紫微東胡星森耀
芒憑陵逐鯨鯢唐突驅犬羊縱火三月赤戰塵千里黃殺函
與府寺從此俱荒涼茲地乃蔓草故基摧壞牆枯池接斷岸
唧唧啼寒螿敗荷塌作泥死竹森如槍遊人問老吏相對聊

感傷豈必見麋鹿然後堪迴腸幸今遇太平令節稱羽觴誰知曲江曲歲歲棲鸞凰

杜秋娘詩

杜牧

杜秋金陵女也年十五爲李錡妾後錡叛滅籍之入宮有寵于景陵穆宗卽位命秋爲皇子傅姆皇子壯封漳王鄭注用事誣丞相欲去已者指王爲根王被罪廢削秋因賜歸故鄉予過金陵感其窮且老爲之賦詩

京江水清滑生女白如脂其間杜秋者不勞朱粉施老漚卽山鑄後庭千蛾眉秋持玉斚醉與唱金縷衣漚旣白首叛秋亦紅淚滋吳江落日渡灞岸楊柳垂聯裾見天子盼眄獨依

依椒壁懸錦幕鏡奩蟠蛟螭低鬟認新寵窈窕復融怡月上
白璧門桂影涼參差金階露新重閑捻紫簫吹莓苔夾城路
南苑雁初飛紅粉羽林仗獨賜辟邪旗歸來煮豹胎饜飫不
能飭咸池昇日慶銅雀分香悲雷音復車遠事往落花時燕
媒得皇子壯髮綵綵畫堂授傅姆天人親捧持虎睛珠絡
襍金盤犀鎮帷長楊射熊羆武帳弄啞咿漸拋竹馬劇稍出
舞雞奇嶄嶄整冠佩侍宴坐瑤池眉宇儼圖畫神秀射朝暉
一尺桐偶人江充知自欺王幽茅土削秋放故鄉歸觚稜拂
斗極回首尙遲遲四朝三十載似夢復疑非潼關識舊吏吏
髮已如絲卻喚吳江渡舟人那得知歸來四鄰改茂苑草菲
菲清血灑不盡仰天知問誰寒衣一匹素夜借鄰人機我昨

金陵過聞之爲歔歔自古皆一貫變化安能推夏姬滅兩國
逃作巫臣妻西子下姑蘇一舸逐鴟夷織室魏豹俘作漢太
平基誤置代籍中兩朝尊母儀光武紹高祖本係生唐兒珊
瑚破高齊作婢春黃糜蕭后去揚州突厥爲閼氏女子固不
定士林亦難期射鉤復呼父釣翁王者師無國要孟子有人
毀仲尼秦因逐客令柄歸丞相斯安知魏齊首見斷簀中屍
給喪蹶張輩廊廟冠裳危珥貂七葉貴何妨戎虜支蘇武卻
生返鄧通終死飢主張旣難測翻覆亦其宜地盡有何物天
外復何之指何爲而捉足何爲而馳耳何爲而聽目何爲而
窺己身不自曉此外何思惟因傾一樽酒題作杜秋詩愁來
獨長詠聊可以自怡

汾上宴別

一作許
渾詩

趙嘏

雲物如故鄉山川知異路年來未歸客馬上春色暮一尊花
下酒殘日水西樹不待管絃終搖鞭背花去

長門怨

劉皐

營營孤思通寂寂長門夜妾妒亦知非君恩那不借攜琴就
玉階調悲聲未諧將心寄明月流影入君懷

寄遠

劉駕

雪花豈結子徒滿連理枝嫁作征人妻不得長相隨去年君
點行賤妾是新姬別早見未熟入夢無定姿悄悄空閨中蛩
聲遶羅幃得書喜猶甚況復見君時

棄婦

回車在門前欲上心更悲路傍見花發似妾初嫁時養蠶已成繭織素猶在機新人應笑此何如妾畫眉昨日惜紅顏今日畏老遲良媒去不遠此恨今告誰

杏園卽席上同年

曹鄴

岐路不在天十年行不至一旦公道開青雲在平地枕上數聲鼓衡門已如市白日探得珠不待驪龍睡息息出九衢僮僕顏色異故衣未及換尙有去年淚晴陽照花影落絮浮野翠對酒時忽驚猶疑夢中事自憐孤飛鳥得接鸞凰翅永懷共濟心莫起胡越意

古詞

高闕礙飛鳥人言是君家經年不歸去愛妾面上花妾面雖

言雪山房唐詩卷七
有花妾心非女蘿郎妻自不重於妾欲如何

古宴曲

于濱

雉扇合蓬萊朝車回紫陌重門集嘶馬言宴金張宅燕娥奉
卮酒低鬟若無力十戶手胼胝鳳凰釵一隻高樓齊下視日
照羅衣色笑指負薪人不信生中國

擬古意

白玉若無玷花顏須及時國色久在室良媒亦生疑鴉鬟未
成髻鸞鏡徒相知翻慙效顰者卻笑從人遲

詠田家

聶夷中

二月賣新絲五月糶新穀醫得眼前瘡剜卻心頭肉我願君
王心化作光明燭不照綺羅筵只照逃亡屋

入林屋洞

皮日休

齋心已三日筋骨如煙輕腰下佩金獸手中持火鈴幽塘四
百里中有日月精連互三十六各各爲玉京自非心至誠必
被神物烹顧余慕大道不能惜微生遂招放曠侶同作幽憂
行其門纔函丈初若盤薄硯洞氣黑眈眈苔髮紅拳拳試足
值坎窞低頭避崢嶸攀援不知倦怪異焉敢驚匍匐一百步
稍稍策可橫忽然白蝙蝠來撲松炬明人語散澗洞石響高
玲玎腳底龍蛇氣頭上波濤聲有時若服匿偈仄如見繡俄
爾造平澹豁然逢光晶金堂似鑄出玉座如琢成前有方丈
沼凝碧融人情雲漿湛不動琉璃涵而馨漱之恐減算酌之
必延齡愁爲三官責不敢攜一瓢昔云夏后氏於此藏真經

刻之以紫琳秘之以丹瓊期之以萬祀守之以百靈焉得彼
丈人竊之不加刑石匱一以出左神俄不局禹書旣云得吳
國由是傾薛縫纔半尺中有怪物腥欲去旣嚙啗將迴又伶
俛卻遵舊時道半日出杳冥屨泥惹石髓衣濕霑雲英元籙
乏仙骨青文無絳名雖然入陰宮不得朝上清對彼神仙窟
自厭濁俗形卻憎造物者遣我騎文星

縹緲峯

頭戴華陽帽手拄大夏筇清晨陪道侶來上縹緲峯帶雲嗅
藥蔓和雲尋荒踪時驚鼯鼯鼠飛上千丈松翠壁內有室叩
之虛磻磻古穴下徹海視之寒鴻濛遇歇有佳思緣危無倦
容須臾到極頂似鳥穿樊籠恐足蹈海日疑身凌天風眾岫

點巨浸四方接圓穹似將青螺髻撒在明月中片白作越分
孤嵐爲吳宮一陣靉靄雲隱隱生湖東激雷與波起狂電將
日紅磬磬雨點大金鼙轟下空暴光隔雲閃髣髴互天龍連
拳百丈尾下拔湖之洪粹爲一雪山欲與昭回通移時卻擁
下細碎衡與嵩神物諒不測絕景尤難窮杖策下返照漸聞
仙觀鐘煙波噴肌骨雲壑填心胷竟死愛未足當生且歡逢
不然把天爵自爲太湖公

銷夏灣

太湖有曲處其門爲兩崖當中數十頃別如一天池號爲銷
夏灣此名無所私赤日莫斜照清風多遙吹沙嶼掃粉墨松
竹調塤箎山果紅韎鞬水苔青髣髴木陰厚若瓦巖磴滑如

言
節我來此遊息夏景方赫曦一坐盤石上肅肅寒生肌小艇
或可汎短策或可支行驚翠羽起坐見白蓮披歛袖弄輕浪
解巾敵涼颼但有水雲見更餘沙禽知京洛往來客喝死緣
奔馳此中便可老焉用名利爲

崦裏

崦裏何幽秀膏腴二十頃風吹稻花香直過龜山頂青苗細
膩臥白羽悠溶靜塍畔起鷗鷺田中通舴艋幾家傍潭洞孤
戍當林嶺罷釣時煮菱停繰或焙茗峭然八十翁生計於此
永苦力供征賦怡顏過朝暝洞庭取異事包山極幽景念爾
飽得知亦是遺民幸

明月灣

陸龜蒙

昔聞明月觀

在建業

祇傷荒野基今來明月灣不值三五時擇

此二明月洞庭看最奇連山忽中斷遠樹分毫釐周迴二十
里一片澄風漪見說秋半夜淨無雲物欺兼之星斗藏獨有
神仙期初聞鏘鏘銚積漸調參差空中卓羽衛波上停龍螭
縱舞玉煙節高歌碧霜詞清光悄不動萬象寒咿咿此會非
俗致無由得旁窺但當乘扁舟酒甕仍相隨或徹三弄笛或
成數聯詩自然瑩心骨何用神仙爲

太湖石

他山豈無石厥狀皆可薦端然遇良工坐使天質變或栽基
棟宇磊砢來廣殿或剖出溫瑜精光具華瑱或將破讐敵百
礮資苦戰或用鏡功名萬古如會面今之洞庭者一以非此

言山房詩卷七
選槎牙真不材反作天下彥所奇者嵌空所尙者蔥蒨旁穿
參洞穴內竅均環釧刻削九琳窗玲瓏五明扇新雕碧霞段
旋破秋天片無力置池塘臨風只流眄

感事

將軍被鮫函祇畏金石鏃豈知讒箭利一中成赤族古來信
簧舌巧韻淒鏘曲君聞悅耳音盡日聽不足初因起毫髮漸
可離骨肉所以賢達心求人須任目

贈遠

芙蓉匣中鏡欲照心還嬾本是細腰人別來羅帶緩從君出
門後不奏雲和管妾思冷如簧時時望君暖心期夢中見路
永魂夢短愁坐泣西風秋窗月華滿

別離

丈夫非無淚不灑離別間
仗劒對尊酒恥爲游子顏
蝮蛇一螫手壯士卽解腕
所志在功名離別何足歎

開元寺樓看雨聯句

龜蒙

皮日休

海上風雨來掀轟雜飛電
登樓一憑檻滿眼蛟龍戰

龜蒙

須臾

造化慘倏忽堪輿變萬戶
響戈鋌千家披組練

皮日休

羣飛拋輪

石雜下攻城箭點急似摧
冒行斜如中面

龜蒙

細灑魂空冷橫

飄目能眩垂檐珂珮喧
掣瓦珠璣濺

皮日休

無言九陔遠瞬息馳

應徧密處正垂絙微時又
懸綫

龜蒙

寫作玉界破吹爲羽林旋

翻傷列缺勞卻怕豐隆倦

皮日休

遙瞻山露色漸覺雲成片
遠樹

欲鳴蟬深檐尙藏燕

龜蒙

殘雷隱鱗盡反照依微見
天光潔似

磨湖彩熟於練

日休

疏帆逗前渚晚磬分涼殿接思強揮毫窺

詞幾焚硯

龜蒙

佶栗鳥皮几輕明白羽扇畢景好疏吟餘涼可

清宴

日休

君攜下高磴僧引還深院駁蘚淨鋪筵低松濕垂鬚

龜蒙

齋明乍虛豁林霽逾蔥蒨早晚重登臨欲去多離戀

日休

相思怨

李冶

人道海水深不抵相思半海水尚有涯相思渺無畔攜琴上

高樓樓虛月華滿彈著相思曲絃腸一時斷

覽古

吳筠

聖人垂大訓奧義不苟設天道殃頑凶神明祐懿哲斯言猶
影響安得復迴穴鯨鯢誕英睿唐虞育昏孽盜跖何延期顏
生乃短折魯隱全克讓禍機遂潛結楚穆肆巨逆福柄奚赫

烈田常弑其主祚國久罔缺管仲存霸功世祖成詭說漢氏
方版蕩羣閭恣邪譎謬謬陳蕃徒孜孜抗忠節誓期區宇靜
爰使兇醜絕謀協事靡從俄而反誅滅古來若茲類紛擾難
盡列道遐理微茫誰爲我昭晰吾將詢上帝寥廓詎躋徹已
矣勿用言忘懷庶自悅

雜詩

寒山

重巖我卜居鳥道絕人迹庭際何所有白雲抱幽石住茲凡
幾年履見春冬易寄語鐘鼎家虛名定何益
欲得安身處寒山可長保微風吹幽松近聽聲愈好下有斑
白人喃喃讀黃老十年歸不得忘卻來時道

讀雪山房唐詩卷七終



